

元勳

明

沐英字文英祖貫樂平人定遠籍八歲而孤隨明太祖賜姓
朱氏後復命姓沐氏屢建功爲開國元勳封西平侯卒後
追封黔寧王子春襲封又立功晉黔國公其子孫世鎮雲
南洪武中遣指揮鄭祥至樂平致祭先塋立神道碑于大
汾潭祖墓側以垂永久其勳績詳見紀冊茲不復載

國朝

范文程字現斗祖貫樂平人瀋陽籍九世祖景申戊遼左六
世生鏊字平甫登明正德十二年進士擢守河南尋知兩
淮鹽運擢巡撫寧夏晉兵部尚書鏊生澄澄生楠楠生文
程幼補博士弟子員以文武全才從我

太祖皇帝龍飛叅贊機務克著元勳順治甲申

國家定鼎燕京以公翊戴功晉內秘書院大學士掌院事時方開創凡收攬人心悉以寬大行之整飭紀綱無不合節至於調度兵食進退人才種種相業俱詳在

國史中居政府掌機務十有七載燮理功高先憂後樂綽有祖風年未六旬即上章歸政固留不可特晉太師其勳名壽考善始全終尤爲世所罕及長子達理任總督倉場戶部侍郎次子承謨登順治壬辰進士官內翰林秘書院學士巡撫浙江尋擢浙閩總督餘皆仕宦濟濟稱盛云祀邑鄉賢祠